



DECRETO

**Asunto: Convocatoria de axudas a deportistas para asistencia a competicións. Ano 2023.
Expdte.- 2023/EGFAB/000058**

I.- A LXS dispón no seu artigo 17.2 que *as bases reguladoras das subvencións das corporacións locais deberanse aprobar no marco das bases de execución do orzamento, a través dunha ordenanza xeral de subvencións ou mediante unha ordenanza específica para as distintas modalidades de subvencións.*

II.- O Pleno da Corporación, na sesión extraordinaria celebrada o día 17 de novembro do 2020, acordou a aprobación inicial da Ordenanza Reguladora das Bases de subvencións do Concello de Oleiros, que entrou en vigor o día 9 de febreiro de 2021.

O Título II da Ordenanza contén as Bases reguladoras para a concesión de subvencións destinadas ao fomento do deporte.

O artigo 3 da Ordenanza dispón que *o Concello de Oleiros fará públicas as convocatorias necesarias para a concesión de subvencións que se realizarán mediante resolución da Alcaldía. Ao devandito efecto a convocatoria deberá fixar a contía total máxima destinada ás subvencións convocadas e poderá tomar forma de convocatoria aberta de conformidade co establecido no artigo 59 do Regulamento da Lei Xeral de Subvencións. O procedemento para a concesión iniciarase de oficio mediante resolución de convocatoria que deberá prever o contido do artigo 23 da Lei 38/2003, do 17 de novembro, Xeral de Subvencións.*

III.- O 20/02/2023 foi dictada providencia pola Cuarta Tenente de alcalde delegada de Deportes, Formación e Emprego, Turismo e Promoción Económica, pola que ordea a incoación do procedemento de Convocatoria de axudas a deportistas para asistencia a competicións, correspondente ao exercicio de 2023.

En cumprimento do ordeado, formúlase proposta de convocatoria polo Técnico Municipal de Deportes.

IV.- En cumprimento do ordeado, o 28/02 formúlase proposta de convocatoria polo Técnico Municipal de Deportes.

A proposta foi informada favorablemente pola responsable da Unidade Xurídica da área e pola Intervención Municipal.

Á vista do exposto, en exercicio da facultade que teño atribuída na Ordenanza Reguladora das Bases de subvencións do Concello de Oleiros,

RESOLVO:



Primeiro.- Autorizar un gasto de 12.000 euros para facer fronte á convocatoria de *axudas a deportistas para asistencia a competicións* correspondente ao ano 2023.

Segundo.- Aprobar a seguinte CONVOCATORIA DE AXUDAS A DEPORTISTAS PARA ASISTENCIA A COMPETICIÓN:

“EXPOSICIÓN DE MOTIVOS

Nos últimos anos a traxectoria deportiva de varios clubs e deportistas de Oleiros ven experimentando unha importante progresión desde o punto de vista do rendemento deportivo e polo tanto tamén na consecución de importantes logros nas competicións nas que participan.

Unha das liñas básicas da política deportiva municipal é o fomento do deporte de base. Os instrumentos para iso son fundamentalmente as axudas económicas directas aos clubs, programas de torneos base, programas de dinamización deportiva no eido escolar e posta a disposición dos clubs deportivos dunha importante rede de instalacións e dotacións deportivas (campos de fútbol, pavillóns deportivos, piscinas, ximnasios, centros náuticos, etc).

Para dar continuidade a esta liña básica, o Concello de Oleiros tamén quere recoñecer e prestar o seu apoio a deportistas oleirenses que compiten a nivel internacional, así como a deportistas pertencentes a clubs do Concello que acadan logros importantes en campionatos de ámbito estatal.

O obxectivo fundamental é o recoñecemento ao esforzo persoal, a constancia no traballo, ao compromiso consigo mesmo e cos compañeiros, e sobre todo o reforzo á continuidade e consolidación da práctica deportiva destes rapaces e rapazas. Ao mesmo tempo tampouco podemos ser alleos ao esforzo de moitas familias que acompañan aos seus fillos e fillas neste camiño de formación persoal por medio do rendemento deportivo. Este esforzo en moitas ocasións se traduce tamén en esforzo económico derivado dos desprazamentos que teñen que realizar para participar nas competicións, dado que non sempre desde as respectivas federacións ou clubs cubren todos os gastos derivados dos desprazamentos para participación nas correspondentes probas deportivas.

Conscientes da importancia que as circunstancias sinaladas teñen para este Concello, consideramos que debemos seguir colaborando con estes deportistas, coa convocatoria de axudas para asistir a campionatos de carácter internacional e a campionatos de España ou campionatos oficiais de ámbito estatal.

I.- Obxecto da subvención

É obxecto desta convocatoria a concesión de axudas individuais a deportistas do Concello de Oleiros seleccionados para participar en eventos deportivos oficiais de carácter internacional, así como deportistas que acudan a campionatos de España ou campionatos oficiais de ámbito estatal e acaden algún dos tres primeiros postos.

Son competicións subvencionables as que se celebren ou se teñan celebrado entre 1 de outubro de 2022 e o 31 de xullo de 2023.

Quedan excluídos da convocatoria aqueles eventos relacionados coa caza, coa pesca ou actividades a motor, así como a categoría de veteranos de calquera competición.

Esta subvención é compatible con outras subvencións, axudas, ingresos ou recursos para a





mesma finalidade.

II.- Importe e aplicación orzamentaria

O importe máximo da convocatoria é de 12.000 euros, que se outorgarán con cargo á aplicación orzamentaria 81.341.48902.

III.- Requisitos dos beneficiarios e características das competicións

Poderán ser beneficiarios destas axudas os deportistas que reúnan os requisitos seguintes:

1. Estar empadroados no Concello de Oleiros de xeito consecutivo durante os tres anos completos anteriores á data de publicación da convocatoria no Boletín Oficial da Provincia.
2. Estar en posesión de licenza federativa en vigor na disciplina deportiva correspondente.
3. Que se dean as seguintes circunstancias, segundo o **ámbito** de competición de que se trate:
 - a. En Competicións internacionais:
 - ✓ Participar en competicións deportivas oficiais en disciplinas que contén con federación deportiva galega, española e internacional.
 - ✓ Ter sido seleccionado pola respectiva federación española ou galega para participar nas competicións devanditas.
 - b. En Competicións de ámbito estatal:
 - ✓ Participar en campionatos de España ou campionatos oficiais de ámbito estatal en disciplinas que contén con federación deportiva galega e española e ter obtido algún dos tres primeiros postos.
 - ✓ Ter como mínimo 16 anos (a cumprir durante o ano da convocatoria).
 - ✓ Competir na máxima categoría que lle corresponda ou en categoría absoluta/élite.
 - ✓ Que a competición teña a participación mínima que se sinala a continuación dentro da propia modalidade, sexo e categoría solicitadas:
 - 5 deportistas ou equipos en categorías femininas.
 - 15 deportistas ou equipos en categorías masculinas.

Enténdese por campionato oficial o que é organizado e promovido directamente desde a federación deportiva correspondente. Agás nos casos de Campionatos de España, de Europa, do Mundo e Xogos Olímpicos, poderase requerir aos deportistas que acrediten o carácter oficial da competición para a que soliciten axuda (Opens, Copas, Torneos, etc).

4. Atoparse ao corrente nas súas obrigas tributarias e coa Seguridade Social e non ser debedor da Facenda Municipal.

IV.- Solicitudes

1. As solicitudes deberán presentarse dalgún dos seguintes xeitos:
 - Electrónicamente: na Sede electrónica municipal, no trámite correspondente a esta convocatoria.
 - Presencialmente: no rexistro municipal sito no Centro Cultural “A Fábrica” (Rúa do Inglés,



13 – 15172, Perillo), no formulario normalizado que se inclúe nesta convocatoria; sen prexuízo do que dispón o artigo 16.4 da Lei 39/2015, de 1 de outubro, do Procedemento Administrativo Común das Administracións Públicas.

2. O prazo de presentación de solicitudes será desde o día seguinte á publicación desta convocatoria no BOP da Coruña ata o 10 de agosto de 2023.

3. a) Só poderá solicitarse axuda para un dos ámbitos sinalados no artigo anterior (estatal/internacional), sen que en ningún caso podan acumularse competicións correspondentes aos dous ámbitos.

b) En caso de que o ámbito escollido sexa o estatal, poderase solicitar axuda para unha única competición. Se fosen solicitadas dúas ou máis, entenderase que a última solicitude invalida ás anteriores e darase trámite unicamente á última que se presente.

c) Dentro do ámbito internacional poderán acumularse as solicitudes de participación exclusivamente cando se refiran ás seguintes competicións: Campionato de Europa, Campionato do Mundo ou Xogos Olímpicos. O máximo permitido será 1 solicitude por cada unha delas.

4. A Administración poderá demandar dos solicitantes a documentación que considere oportuna para ampliar a súa información a efectos da concesión das axudas.

5. Xunto coa solicitude deberá acompañarse a seguinte documentación:

▪ En todos os casos:

- ✓ Fotocopia do DNI/NIE do solicitante ou do seu representante legal (pai, nai ou titor).
- ✓ Licencia federativa en vigor.
- ✓ Datos identificativos da conta na que desexa percibir a axuda (IBAN), mediante fotocopia compulsada da cartilla ou certificado expedido pola súa entidade bancaria. O solicitante deberá ser titular ou cotitular da mesma.

▪ Competicións internacionais, ademáis:

- ✓ Orixinal ou copia compulsada do Documento federativo que acredite que o deportista solicitante foi seleccionado pola respectiva federación para competir na competición internacional para a que solicita a axuda e o lugar no que se vai desenvolver ou xa se desenvolveu.

▪ Competicións estatais, ademáis:

- ✓ Orixinal ou copia compulsada do Documento federativo que acredite que o deportista solicitante obtivo algún dos tres primeiros postos na correspondente competición oficial de ámbito estatal.
- ✓ Acreditación do número total de participantes na competición de ámbito estatal (ben mediante certificación federativa ou ben por calquera outro medio que o órgano concedente considere admisible).

6. Poderá aportarse xunto coa solicitude a documentación xustificativa da realización da actividade.

7. Se a solicitude non está correctamente formulada ou faltan datos ou documentación necesarios, o órgano competente requirirá ao interesado para que emende as fallas ou acompañe os documentos preceptivos no prazo máximo e improrrogable de dez días, indicándolle que se non o fixese teráselle por desistido da súa solicitude despois da resolución á que se refire o artigo 68 da Lei 39/2015, de 1 de outubro, do Procedemento Administrativo Común das Administracións Públicas.





A presentación dunha solicitude de subvención implicará que se autoriza ao Concello a consultar de oficio a situación do solicitante no Padrón municipal e a antigüidade no mesmo, así como o estado de débedas coa AEAT, Seguridade Social e o propio Concello.

V. Límites das axudas.

1. Só se concederá axuda para un dos ámbitos sinalados no artigo III.3., sin que en ningún caso podan acumularse competición estatal e internacional.
2. En caso de que o ámbito escollido sexa o estatal, só se concederá axuda para unha competición.
3. En caso de que o ámbito escollido sexa o internacional, poderanse acumular as axudas nos casos establecidos no parágrafo IV.3.c) desta convocatoria, sendo o importe máximo a conceder o correspondente a unha axuda para cada un dos tres campionatos sinalados.
4. No suposto de que o importe da convocatoria fose insuficiente para outorgar as cantidades que correspondesen a cada deportista, efectuarase unha minoración proporcional nos importes de todos os beneficiarios, ata que o importe total da concesión se equipare ao total da convocatoria.

VI.- Contías individuais

A) As contías das axudas a deportistas que acudan a campionatos internacionais ascenderán aos seguintes importes:

- a) Importe por participación:
 - Por participar nunha competición oficial denominada “ Campionato de Europa” e recoñecido así pola federación internacional correspondente.- 500 euros.
 - Por participar nunha competición oficial denominada “Campionato do Mundo” e recoñecido así pola federación internacional correspondente.- 750 euros.
 - Por participar nuns xogos olímpicos.- 1.000 euros.
- b) Importe en función da distancia desde Oleiros ao lugar de celebración da competición:
 - Localidade que diste de Oleiros entre 500 e 1000 kms.- 300 euros.
 - Localidade que diste de Oleiros entre 1001 e 2000 kms.- 400 euros.
 - Localidade que diste de Oleiros entre 2001 e 3000 kms.- 500 euros.
 - Localidade que diste de Oleiros máis de 3000 kms.- 600 euros.

Se a distancia co lugar de celebración do evento é inferior a 500 km., aboarase só o importe que corresponda segundo o parágrafo a) deste artigo.

- c) O importe máximo total a adicar a deportistas que compitan en modalidades de equipo non poderá exceder do 25 por cento do importe total da convocatoria.

B) Contía das axudas a deportistas que obteñan algún dos tres primeiros postos en campionatos de España ou competicións oficiais de ámbito estatal.

1. Importe en función do resultado da competición:
 - a) Modalidades de carácter individual:



- ◆ 1º posto.- 600 euros.
- ◆ 2º posto .- 500 euros
- ◆ 3º posto .- 400 euros

b) Modalidades colectivas ou de equipos:

No caso das axudas a deportistas de disciplinas colectivas ou de equipos, as cantidades a outorgar a cada deportista serán as mesmas que nas modalidades individuais, pero cos seguintes límites por equipo:

- ◆ 1º posto.- 1.800 euros/equipo.
- ◆ 2º posto .- 1.500 euros/equipo.
- ◆ 3º posto .- 1.200 euros/equipo.

En caso de que a cantidade a conceder a varios solicitantes do mesmo equipo exceda destes límites, o importe ratearase entre os/as solicitantes.

VII.- Concesión

1. A adxudicación levarase a cabo en réxime de concorrencia non competitiva, xa que o único criterio para a adxudicación é o cumprimento polo solicitante dos requisitos esixidos.

2. Unha vez rematado o prazo de solicitudes e enmendadas as eivas nas mesmas, serán examinadas polo órgano instrutor, que será un órgano colexiado composto por:

Presidente: Técnico Municipal de Deportes.

Vocal: Animador Deportivo.

Secretaria: Unha auxiliar administrativa da Unidade Xurídica de Cultura, Ensino, Deportes, Formación, Emprego e Xuventude.

Suplente do Presidente: O animador Deportivo.

Suplente do Vocal: O Coordinador de programas educativos.

Unha vez comprobado o cumprimento dos requisitos que dá lugar á concesión da axuda, o órgano instrutor formulará a proposta de resolución provisional, que se publicará no Taboleiro de Edictos da Sede Electrónica do Concello de Oleiros, e no do Centro Cultural “A Fábrica”, así como na páxina web do Concello, concedéndose un prazo de 10 días para presentar alegacións. Dita relación publicarase unicamente co número do documento de identidade que os solicitantes aportaran na súa solicitude.

Transcorrido dito prazo e examinadas as alegacións aducidas no seu caso polos interesados, o órgano instrutor formulará a proposta de resolución definitiva, que presentará á Alcaldía para a súa aprobación. En caso de non presentarse alegacións, a proposta provisional devirá definitiva.

3. As axudas serán concedidas por Resolución da Alcaldía.

4. Toda alteración das condicións que fosen tidas en conta para a concesión da subvención, ou a obtención concorrente doutras subvencións ou axudas para a mesma finalidade poderá dar lugar á modificación da resolución de concesión.

5. A resolución pon fin á vía administrativa, e contra ela, sexa expresa ou presunta, poderanse interpor os recursos que correspondan.

6. A concesión publicarase no Taboleiro de Edictos DA SEDE ELECTRÓNICA do Concello de





Oleiros, e no do Centro Cultural “A Fábrica”, así como na páxina web do Concello

7. Asemade, publicitarase nos términos previstos nos artigos 18 e seguintes da Lei 38/2003, de 17 de novembro, Xeral de Subvencións.
8. De acordo co previsto no artigo 20.8 da Lei 38/2003, de 17 de novembro, Xeral de Subvencións, efectuarase a remisión á Base de Datos Nacional de Subvencións da información relativa ás subvencións concedidas.
9. As axudas concedidas ao amparo desta convocatoria serán consideradas, a efectos do IRPF, como rendementos de actividades profesionais, polo que se lles aplicará a retención que corresponda de acordo coa normativa vixente no momento do pagamento.
10. O prazo para a resolución do procedemento e a notificación da concesión será de seis meses desde que remate o prazo de presentación de solicitudes.

VIII.- Publicidade das axudas

O Concello efectuará a publicidade da concesión das axudas nos seus propios medios de comunicación.

IX.- Xustificación e pagamento

1. A xustificación deberá presentarse no Rexistro municipal sito no Centro Cultural “A Fábrica”, e para a mesma deberán aportarse os seguintes documentos, en caso de que non tivesen sido xa aportados xunto coa solicitude:

▪ Competicións internacionais:

- ✓ Certificación expedida pola federación española e/ou galega da disciplina en cuestión, na que conste a participación efectiva do solicitante no campionato internacional para o que se solicitou a axuda, no seu caso.

2. Os beneficiarios deberán presentar a documentación xustificativa no prazo de quince días naturais contados a partir do seguinte á publicación da concesión da axuda.

3. Xunto coa concesión ordearase o pagamento anticipado da subvención.

Porén, nos casos en que fose preciso aportar algunha xustificación posterior, xunto co pagamento ordearase unha retención do cen por cento do importe en concepto de garantía, ata que sexa presentada a xustificación.

4. Se a xustificación presentada non reúne os requisitos necesarios, estarase ao disposto nos parágrafos 2 e 3 do artigo 73 da Lei 39/2015, de 1 de outubro, do Procedemento Administrativo Común das Administracións Públicas.

5. De non presentar xustificación ningunha dentro do prazo, a unidade xestora remitiralle un requerimento á persoa beneficiaria para que a presente no prazo improrrogable de quince días. A falla de xustificación da subvención neste prazo excepcional suporá a renuncia á subvención outorgada, así como a esixencia do reintegro e demais responsabilidades dispostas na Lei Xeral de Subvencións.



X.- Normativa reguladora

A presente convocatoria rexerese polas normas establecidas nesta convocatoria e pola Ordenanza reguladora das bases de subvencións do Concello de Oleiros, aprobada polo Concello Pleno o 17 de novembro do 2020; pola Lei 38/2003, de 17 de novembro, Xeral de Subvencións, nos preceptos que teñen carácter básico; a Lei 9/2007, de 13 de xuño, de subvencións de Galicia; a Lei 39/2015, de 1 de outubro, do Procedemento Administrativo Común das Administracións Públicas e demais normas de dereito administrativo, e, no seu defecto, aplicaranse as normas de dereito privado.

FORMULARIO DE SOLICITUDE DE AXUDA PARA ASISTENCIA A COMPETICIÓNS DEPORTIVAS.

A.- DATOS PERSOAIS DO SOLICITANTE

APELIDOS E NOME _____
NIF _____ TELÉFONO _____
ENDEREZO _____
LOCALIDADE _____ CÓDIGO POSTAL _____
ENDEREZO ELECTRÓNICO _____

B.- DATOS DO REPRESENTANTE (no seu caso)

APELIDOS E NOME _____
NIF _____ TELÉFONO _____
ENDEREZO _____
LOCALIDADE _____ CÓDIGO POSTAL _____
RELACIÓN CO SOLICITANTE _____
ENDEREZO ELECTRÓNICO _____

C.- TIPO DE SUBVENCIÓN QUE SOLICITA

- CAMPIONATOS INTERNACIONAIS
 - MODALIDADE INDIVIDUAL
 - MODALIDADE COLECTIVA OU DE EQUIPO

- COMPETICIÓNS DE ÁMBITO ESTATAL:
 - MODALIDADE INDIVIDUAL
 - MODALIDADE COLECTIVA OU DE EQUIPO

D.- DATOS DEPORTIVOS

MODALIDADE DEPORTIVA _____
CLUBE _____
CAMPEONATO _____
LUGAR DE CELEBRACIÓN _____
DATA DE CELEBRACIÓN _____
POSTO OBTIDO (só en caso de competicións de ámbito estatal) _____
Nº DE PARTICIPANTES (só en caso de competicións de ámbito estatal) _____





E.- DATOS DA CONTA ONDE DESEXA PERCIBIR A AXUDA.

NIF DO TITULAR _____

ENTIDADE _____

IBAN _____

F.- DOCUMENTACIÓN QUE SE APORTA (marcar exclusivamente os documentos aportados xunto con esta solicitude):

- DNI solicitante
- DNI representante
- Licenza federativa
- Documento conta corrente
- Certificado da federación acreditativo de ter sido seleccionado (Competicións internacionais)
- Certificado da Federación acreditativo do posto obtido (Competicións estatais)
- Acreditación do número total de participantes (Competicións estatais)
- Outros (detallar): _____

G.- A CUMPLIMENTAR POR TODOS OS SOLICITANTES

D./^a _____ (deportista ou o seu representante), DECLARA BAIXO A SÚA RESPONSABILIDADE:

1. Que acepta todas as condicións da presente convocatoria.
2. Que se atopa ao corrente nas súas obrigas tributarias e coa Seguridade Social, e que autoriza ao órgano instructor da subvención para solicitar de oficio as consultas de atoparse ao día nas obrigas tributarias coa AEAT , e Seguridade Social, así como co Concello de Oleiros.
3. Que leva empadroad/a no Concello de Oleiros de xeito consecutivo durante os tres anos completos anteriores á data de publicación da convocatoria no BOP, e que autoriza ao órgano xestor desta convocatoria a realizar de oficio a consulta pertinente ao Padrón Municipal.
4. Que o importe das subvencións recibidas para este mesmo concepto, desta e doutras administracións públicas, non supera o custe da actividade subvencionada.
5. Que todos os datos incorporados á presente solicitude axústanse á realidade, quedando enterado de que a inexactitude dos datos declarados dará lugar á denegación ou revogación da axuda.
6. Que acepta a notificación da concesión ou denegación da axuda solicitada, así como requerimentos ou calquera outra comunicación que lle efectúe o Concello por este motivo, mediante correo electrónico ao enderezo que se sinala neste documento.
7. Que coñece e acepta que a publicidade da axuda concedida e o nome do deportista subvencionado sexa efectuada polo Concello nos seus propios medios de comunicación.

_____, a _____ de _____ de 20____

Sinatura



PROTECCIÓN DE DATOS: O responsable do tratamento dos seus datos é o Concello de Oleiros, que tratará os seus datos coa finalidade de xestionar os trámites relativos á súa solicitude. Os datos conservaranse durante o tempo necesario para cumprir coa finalidade e durante os prazos de prescrición legal. Os datos serán comunicados ás administracións que deban intervir no proceso. Non haberá transferencia internacional de datos. Pode exercer os seus dereitos de acceso, rectificación, supresión, oposición e limitación na nosa sede electrónica, presencialmente no Concello ou en dpd@oleiros.org. Pode contactar co noso Delegado de Protección de Datos no mesmo correo. Pode dirixirse ante a Axencia de Protección de Datos (C. de Jorge Juan, 6, 28001 Madrid, www.aepd.es). Máis información na política de privacidade na nosa web. Consulte o noso Rexistro de Actividades de Tratamento no Portal de Transparencia.

Terceiro.- Que se publique o correspondente anuncio no Boletín Oficial da Provincia da Coruña, por conduto da BDNS, de acordo co prescrito pola Lei 38/2003, de 17 de novembro, Xeral de Subvencións.

En Oleiros, asinado dixitalmente na data que figura na marxe polo Sr. Alcalde e o/a Secretario/a accidental, que da fe. (Asinado aos efectos exclusivamente do artigo 3.2 do RD 128/2018 de 16 de marzo e o artigo 2.1 do Decreto 24/2018 do 15 de febreiro).

